

## Masharti ya Pambano



## SABATO MCHANA

**Somo la Juma Hili:** *Dan. 10:1–14, Ufu. 13:1–8, Ayu. 1:1–12, Ayu. 2:1–7, Yn. 12:31, Yn. 14:30, Mk. 6:5, Mk. 9:29.*

**Fungu la Kukariri:** “atendaye dhambi ni wa Ibilisi; kwa kuwa Ibilisi hutenda dhambi tangu mwanzo. Kwa kusudi hili Mwana wa Mungu alidhihirishwa, ili azivunje kazi za Ibilisi” (1 Yohana 3:8).

**S**imulizi lenye nguvu linalofunua asili ya pambano la ulimwengu mzima linaweza kupatikana katika 1 Wafalme 18:19–40, Eliya juu ya Mlima Karmeli, Bwana anapoifichua inayodhaniwa kuwa “miungu ya mataifa.” Hata hivyo, kuna mengi yaliyo nyuma ya pazia kuhusu “miungu” hii kuliko kwamba ni vitu vilivyobuniwa tu katika fikra za wapagani. Nyuma ya “miungu” ambayo mataifa yaliyowazunguka Israeli yalifikiri yalikuwa yakiabudu, kwa hakika, ilikuwa kitu kingine kabisa.

“Walitoa sadaka kwa pepo, si Mungu, Kwa miungu wasiyoiua, Kwa miungu mipya iliyotokea siku zilizo karibu, Ambayo baba zenu hawakuiofopa” (Kum. 32:17). Paulo anaongeza, “vitu vile wavitoavyo sadaka wavitoa kwa mashetani, wala si kwa Mungu; nami sipendi ninyi kushirikiana na mashetani” (1 Kor. 10:20).

Basi, nyuma ya “miungu” ya uongo ya mataifa kulikuwa na pepo wachafu waliojificha. Hii ina maana, basi, kwamba aya zote za Maandiko zinazohusu ibada ya sanamu na miungu ya kigeni ni aya za “pambano la ulimwengu mzima.”

Kwa usuli huu, mada ya pambano la ulimwengu wote inaeleweka vyema. Na ukweli huu una maana kubwa katika kuelewa zaidi asili ya pambano hili na jinsi unavyofafanua zaidi juu ya tarizo la uovu.

## Malaika Akawizwa

Kama tulivyoona, “miungu” ya uongo ya mataifa ilikuwa pepo wachafu waliojificha. Na mahali pengine tunaona uthibitisho kwamba nyakati fulani watawala wa pepo wachafu waliotoka mbinguni wako nyuma ya watawala wa kidunia. Hata mawakala malaika waliotumwa na Mungu wanaweza kupingwa na nguvu za adui.

**Soma Danieli 10:1–14**, kwa usikivu makini katika aya ya 12 na 13. Aya hizi zinafundisha nini ambacho kinahusiana na pambano la ulimwengu mzima? Je, unaelewa nini kuhusu malaika aliyetumwa na Mungu “kupingwa” kwa siku ishirini na moja?

Inawezekanaje kwamba malaika aliyetumwa na Mungu angeweza “kupingwa” kwa majuma matatu? Kwa kuwa Mungu ni mweza wa yote, Ana uweza wa kumjibu Danieli mara moja—yaani, kama angechagua kufanya hivyo. Ikiwa Angetumia uweza Wake kufanya hivyo, angeweza kumfanya malaika amtokee Danieli mara moja. Hata hivyo, malaika aliyetumwa na Mungu ‘alipingwa’ na “mkuu wa ufalme wa Uajemi” kwa majuma matatu yote. Nini kinaendelea hapa?

“Kwa majuma matatu Gabrieli alishindana na nguvu za giza, akitaka kuzuia ushawishi uliokuwa ukifanya kazi katika akili ya Koreshi. . . . Yote ambayo mbingu ingeweza kufanya kwa ajili ya watu wa Mungu yalifanyika. Ushindi hatimaye ulipatikana; majeshi ya adui yalizuliwa siku zote za Koreshi, na siku zote za mwanawe Cambyes.”—Ellen G. White, *Manabii na Wafalme*, Gombo la Pili, uk. 178.

Ili pambano kama hilo litokee, ni lazima Mungu awe hatumii uweza Wake wote. Adui lazima apewe uhuru na uwezo halisi visivyondolewa kwa ghafla bila kutarajiwa, lakini amewekewa mipaka kwa baadhi ya vigezo vinavyojulikana kwa pande zote mbili (maelezo ambayo hayajafunuliwa kwetu). Inaonekana ni lazima kuwe na vigezo katika pambano la ulimwengu mzima ambavyo hata malaika wa Mungu wanaongozwa navyo, ambavyo katika masomo yajayo vitajulikana kama “masharti ya pambano.”

Kwa maana fulani, kuelewa mipaka hii kunaweza kusiwe vigumu ikiwa tutaelewa wazo, ambalo tayari limezungumziwa, kwamba Mungu anatenda kwa upendo tu, na kwamba upendo, si shuruti, ndiyo msingi wa serikali Yake. Wazo hili, kwamba Mungu anatenda tu kupitia kanuni zinazotokana na upendo, linaweza kutusaidia kuelewa vyema pambano kuu.

**Umepitiaje mipaka ya kutenda kupitia kanuni za upendo tu na si shuruti? Umejifunza nini kuhusu mipaka ya mamlaka?**



## Joka wa Ufunuo

Mtazamo mpana wa watawala wa mbinguni katika pambano la ulimwengu mzima umeelezewa katika kitabu cha Ufunuo, ambapo Shetani anaelezewa kama “joka kubwa” anayempinga Mungu na “audanganya ulimwengu wote” (Ufu. 12:9).

**Soma** Ufunuo 13:1–8. Hili linafunua nini kuhusu ukubwa wa mamlaka ya joka?

Joka (Shetani) si tu anapigana na Mungu (Ufu. 12:7–9) na watumishi Wake (kwa mfano, Ufu. 12:1–6), lakini anaelezewa kama mtawala nyuma ya falme za kidunia zinazotesa watu wa Mungu kwa nyakati zote.

Joka “akampa . . . nguvu zake, na kiti chake cha enzi, na uwezo mwingi” yule mnyama kutoka baharini (Ufu. 13:2, linganisha na Ufu. 13:5; Ufu. 17:13, 14). Mnyama huyu wa baharini “akapewa kinywa cha kunena maneno makuu, ya makufuru. Akapewa uwezo wa kufanya kazi yake miezi arobaini na miwili” (Ufu. 13:5).

Kwa hiyo, Shetani (joka) anampatia mnyama uwezo na mamlaka ya kutawala (mamlaka ya kidunia ya kidini na kisiasa). Mamlaka hii inatumiwa kujitwalia ibada inayomstahili Mungu. Mnyama analikufuru jina la Mungu; pia inapigana na, na hata kuwashinda, watakatifu wa Mungu, angalau kwa muda. Mamlaka hii inayotwala dunia yote amepewa na joka, mtawala aliyejitwalia ulimwengu huu.

Hata hivyo, kuna mipaka iliyo wazi kwa Shetani na mawakala wake, ikijumuisha mipaka ya muda. “Kwa hiyo shangilieni, enyi mbingu, nanyi mkaao humo. Ole wa nchi na bahari! Kwa maana yule Ibilisi ameshuka kwenu mwenye ghadhabu nyingi, akijua ya kuwa ana wakati mchache tu” (Ufu. 12:12).

Shetani “anajua kuwa ana wakati mchache tu” (Ufu. 12:12), na matukio yaliyoelezewa katika Ufunuo yanatokea kwa kufuata mfululizo wa matukio ya kiunabii, yanayoonesha mipaka maalum (tazama Ufu. 12:14, Ufu. 13:5) kwa utawala wa mamlaka hizi za uovu.

Kwa hakika, Mungu anashinda hatimaye. “Naye atafuta kila chozi katika macho yao, wala mauti haitakuwapo tena; wala maombolezo, wala kilio, wala maumivu hayatakuwapo tena; kwa kuwa mambo ya kwanza yamekwisha kupita” (Ufu. 21:4).

**Ingawa ni vigumu kwetu kuuona sasa, hatimaye wema utaushinda uovu milele. Kwa nini ni muhimu sana kutosahau kamwe ahadi hii ya kushangaza?**

## Kisa cha Ayubu

Katika kitabu cha Ayubu, tumepewa ufahamu wa kustaajabisha katika uhalisi wa pambano kuu.

**Soma** Ayubu 1:1–12 na Ayubu 2:1–7. Ni kanuni zipi za pambano kuu tunazoziona zikifunuliwa hapa?

Maelezo mengi muhimu yanaweza kupatikana kutoka katika aya hizi. Kwanza, inaonekana kuna namna fulani ya mandhari ya baraza la mbinguni, si tu mazungumzo kati ya Mungu na Shetani; viumbe wengine wa mbinguni wanahusika.

Pili, kuna mjadala fulani uliopo, unaoashiriwa na ukweli kwamba Mungu anauliza ikiwa Shetani amemwangalia Ayubu. Kumwangalia Ayubu kwa nini? Swali lina mantiki katika muktadha wa mjadala mkubwa, unaoendelea.

Tatu, wakati Mungu akimtangaza Ayubu kuwa mkamilifu, mwelekevu na anayemcha Mungu, Shetani anadai kwamba Ayubu anaonekana kumcha Mungu kwa sababu tu Mungu anamlinda. Hili ni sawa na kashfa dhidi ya tabia ya Ayubu na ya Mungu pia (linganisha na Ufu. 12:10, Zek. 3).

Nne, Shetani anadai kwamba ulinzi wa Mungu kwa Ayubu (ukingo) si haki na hufanya isiwezekane kwa Shetani kuthibitisha madai yake. Hili linaonesha baadhi ya mipaka iliyopo kwa Shetani (masharti ya pambano), na kwamba inaonekana Shetani amejaribu kumdhuru Ayubu.

Mungu anajibu shutuma za Shetani mbele ya baraza la mbinguni kwa kumruhusu Shetani ajaribu nadharia yake, lakini ndani ya mipaka tu. Kwanza anampa Shetani mamlaka juu ya “yote aliyo nayo,” lakini anamzuia asimdhuru Ayubu mwenyewe (Ayu. 1:12). Baadaye, baada ya Shetani kudai kwamba Ayubu anajijali mwenyewe tu, Mungu anamruhusu Shetani kumtesa Ayubu binafsi, lakini Shetani lazima asiguse uhai wake (Ayu. 2:3–6).

Shetani analeta maafa mengi dhidi ya nyumba ya Ayubu, lakini katika kila kisa Ayubu anaendelea kulibariki jina Lake (Ayu. 1:20–22, Ayu. 2:9, 10), akipotosha mashitaka ya Shetani.

Tunajifunza mambo mengi hapa, kama vile kwamba kuna masharti ya kushindana katika pambano la ulimwengu mzima. Kuna vigezo katika mahakama ya mbinguni ambapo madai yaliyotolewa dhidi ya Mungu yanaweza kuamuliwa, lakini bila Mungu kukiuka kanuni takatifu zitokanazo na upendo, msingi wa serikali ya Mungu na jinsi anavyotawala ulimwengu na viumbe wenye akili ndani yake.

Matukio haya ya mbinguni katika kitabu cha Ayubu yanatupa ufahamu wa kustaajabisha juu ya uhalisi wa pambano kuu, na jinsi linavyopiganwa hapa duniani.



## Mkuu (wa Muda) wa Ulimwengu Huu

Tumeona katika masomo yaliyotangulia kwamba, ndani ya pambano la ulimwengu mzima, Shetani na washirika wake wamepewa mamlaka muhimu kwa muda katika ulimwengu huu, wakiwa na mipaka kulingana na aina fulani ya masharti ya pambano.

Masharti haya ya pambano si tu kwamba yanazuia utendaji wa adui—Shetani na washirika wake—lakini pia yanawekea ukomo utendaji wa Mungu wa kuondoa au kupunguza uovu ambao (kwa muda) unaangukia ndani ya mamlaka ya adui. Kwa sababu Bwana hatavunja ahadi Zake kamwe, kiasi cha makubaliano ya masharti ya pambano—hivyo kumpa shetani utawala wenye mipaka na wa muda—Mungu amewekea mipaka ya kimaadili hatua Zake atakazochukua baadaye (bila kupunguza uweza Wake kamili).

**Soma Yohana 12:31, Yohana 14:30, Yohana 16:11, 2 Wakorintho 4:4, na Luka 4:6. Aya hizi zinafundisha nini kuhusu utawala wa adui katika ulimwengu huu?**

---

Agano Jipya linaelezea mgongano wa falme, falme za nuru na giza, na giza likitoka kwa Shetani na uasi wake. Sehemu ya utume wa Kristo ilikuwa kuushinda ufalme wa Shetani: “Kwa kusudi hili Mwana wa Mungu alidhihirishwa, ili azivunje kazi za Ibilisi” (1 Yoh. 3:8).

Hata hivyo, kuna “kanuni” zinazowekea mipaka kile Mungu anachoweza kufanya huku akiendelea kuwa mwaminifu kwa kanuni zinazoongoza serikali Yake. Mipaka hii inajumuisha angalau (1) kutoa uhuru wa kuchagua kwa viumbe na (2) kanuni za kiagano za makabiliano, ambazo hazijafunuliwa kwetu, angalau kwa sasa. Vizuizi hivyo na vikwazo juu ya utendaji wa Mungu vina maana kubwa kwa uwezo wa Mungu wa kimaadili wa kupunguza na/au kuondoa uovu mara moja katika ulimwengu huu. Hivyo, tunaona uovu na mateso vinavyoendelea, ambavyo kwa kweli vinaweza kuwafanya watu wengi watilie shaka kuwepo kwa Mungu au wema Wake. Hata hivyo, baada ya mazingira ya pambano kuu kueleweka, na mipaka ambayo Mungu amewekea juu ya jinsi atakavyokabiliana na uovu, kwa kiwango fulani tunaweza kuelewa vyema zaidi kwa nini mambo yako jinsi yalivyo—angalau hadi ushindi wa mwisho wa Mungu dhidi ya uovu.

**Ukweli kwamba Yesu anamwita Shetani “mtawala” wa ulimwengu huu unasaidiaje, angalau kwa kiasi fulani, kuelewa kwetu kuhusu uovu uliopo ulimwenguni sasa? Inafariji kiasi gani kujua kwamba ni utawala wa muda tu!**

## Mipaka na Masharti

Pambano la ulimwengu mzima kimsingi ni pambano dhidi ya tabia ya Mungu, linalosababishwa na madai ya uongo/uzushi wa ibilisi dhidi ya wema, haki na serikali ya Mungu. Ni aina ya daawa ya agano la ulimwengu mzima.

Pambano kama hilo haliwezi kuamuliwa kwa utawala kamili, lakini, badala yake, linahitaji uthibitisho.

Ikiwa madai mazito yataletwa dhidi ya mtu aliye katika mamlaka, njia bora zaidi (na labda pekee) ya kushinda madai hayo itakuwa kuruhusu uchunguzi huru, wa haki na wazi. Ikiwa madai hayo yanatishia serikali nzima (ya upendo), hayawezi kufichwa pasipo kushughulikiwa.

Haya yote yanamaanisha nini kwa ajili ya kuelewa pambano la ulimwengu mzima na kuhusiana na tatizo la uovu? Ikiwa Mungu anatoa ahadi, je, anaweza kuivunja? Bila shaka hapana. Kwa kadiri Mungu anavyokubali masharti ya pambano, hatua atakayoichukua baadaye itakuwa (kimaadili) yenye mipaka. Kwa hivyo, uovu utakuwa sehemu ya milki ya muda ya ufalme wa giza.

**Soma Marko 6:5 na Marko 9:29. Maandiko haya yanaelezea nini kuhusu jinsi hata utendaji wa Mungu unavyoweza kuhusishwa kama sehemu muhimu ya mambo kama vile imani na maombi?**

Katika masimulizi haya yote mawili, baadhi ya mipaka au masharti ya pambano yanaonekana kuwa yamewekwa, yanayohusiana sana na mambo kama vile imani na maombi. Mahali pengine tunaona ushahidi mwingi kwamba maombi yanaleta mabadiliko katika ulimwengu huu, yakifungua njia kwa ajili ya utendaji wa Mungu ambao vinginevyo usingekuwepo (kimaadili). Hata hivyo, hatupaswi kufanya kosa la kufikiri kwamba imani na maombi ndiyo mambo pekee. Kuna uwezekano wa mambo mengine mengi ambayo tunaweza kuwa hatujui.

Hili linapatana na yale tuliyoyaona hapo awali kuhusu masharti ya pambano. Kama tulivyosema, kuna masharti fulani ya pambano katika pambano kuu yanayowekea ukomo kile Mungu anachoweza kufanya kimaadili, angalau kwa sasa. Kwa hivyo, baadhi ya maovu yanaweza kuangukia ndani milki ya muda ya ufalme wa giza.

**Soma Warumi 8:18 na Ufunuo 21:3, 4. Aya hizi zinakupaje hakika ya kwamba ingawa kuna mambo mengi ambayo hatujui, tunaweza kutumaini kwamba Mungu anajua lililo bora zaidi, anataka lililo bora zaidi na ataukomesha uovu na kuleta umilele wenye furaha?**



**Jifunze Zaidi:** Soma Ellen G. White, "Nguvu ya Shetani," uk. 341–347, katika *Testimonies for the Church*, vol. 1.

"Mwanadamu aliyeanguka ni mateka halali wa Shetani. Utume wa Kristo ulikuwa ni kumwokoia kutoka katika nguvu za adui yake mkuu. Mwanadamu kwa asili anao mwelekeo wa kufuata mapendekezo ya Shetani, na hawezi kumpinga kwa ufanisi adui huyo wa kutisha isipokuwa Kristo, Mshindi mkuu, anakaa ndani yake, akiongoza shauku zake na kumpa nguvu. Mungu pekee ndiye anayeweza kuwekea ukomo nguvu za Shetani. Anakwenda mbele na nyuma duniani, na kutembea huku na huko ndani yake. Hakai mbali na lindo lake hata kwa dakika moja, kwa hofu ya kupoteza nafasi ya kuangamiza roho. Ni muhimu watu wa Mungu walielewe hili, ili waepuke mitego yake. Shetani anaandaa madanganyo yake, ili katika kampeni yake ya mwisho dhidi ya watu wa Mungu wasiweze kuelewa kwamba ni yeye. 2 Wakorintho 11:14: "Wala si ajabu; Maana Shetani mwenyewe hujigeuza awe mfano wa malaika wa nuru." Wakati ambapo watu fulani waliodanganywa wanaotea kwamba hayupo, anawachukua mateka, na anatenda kazi kupitia kwao kwa kiwango kikubwa. Shetani anajua vizuri zaidi kuliko watu wa Mungu uwezo wanaoweza kuwa nao juu yake wakati nguvu zao zikiwa katika Kristo. Wanapomsihi kwa unyenyekevu Mshindi mwenye nguvu ili awasaidie, muumini aliye dhaifu zaidi katika kweli, akimtumaini Kristo kwa uthabiti, anaweza kufanikiwa kumshinda Shetani na jeshi lake lote. Yeye ni mwerevu sana kiasi kwamba hawezi kuja wazi wazi, kwa ujasiri na majaribu yake; kwani hapo nguvu dhaifu za Mkristo zingeamshwa, na angemtegemea Mkombozi mwenye nguvu na hodari. Lakini anakuja bila kutambuliwa, na kufanya kazi kwa kujificha kupitia watoto wa uasi wanaodai kuwa watauwa."—Ellen G. White, *Testimonies for the Church*, vol. 1, uk. 341.

### **Maswali ya Kujadili:**

- ① Inamaanisha nini kuwa "mateka halali wa Shetani"? Je, hilo linamaanisha Shetani anaweza kuwatendea watu chochote anachotaka? Ikiwa siyo, kwa nini? Hili linahusiana vipi na kile tunachoweza kuita "masharti ya pambano" katika pambano la ulimwengu mzima?
- ② Kwa nini Mungu ampe Shetani mamlaka yoyote katika pambano la ulimwengu wote, hata ikiwa ni kwa muda tu? Hili linatambua nini kuhusu jinsi Mungu anavyotafuta kujibu shutuma za Shetani?
- ③ Unawajibuje wale, hata Wakristo, wanaokana uwepo wa Shetani kama nafsi halisi? Ingawa hatuwezi kuthibitisha uwepo wa Shetani, ni uthibitisho gani unaoweza kuutumia kumsaidia mtu ambaye amedanganywa sana?